

## 95. Der alte Hildebrand

Es war amahl a Baur und a Bäurin, und dö Bäurin, dö hat der Pfarra im Dorf gern gesehn, und da hat er alleweil gwunschen, wann er nur amahl an ganzen Tag mit der Bäurin allan recht vergnügt zubringa kunnt, und der Bäurin der wars halt a recht gewesn. No, da hat er amahl zu der Bäurin gsagt: »Hanz, mei liebi Bäurin, hietzt, hab i was ausstudiert, wie wir halt amahl an ganzen Tag recht vergnügt mitanander zubringa kunnten. Wißts was, ös legts eng  
 5 aufm Mittwoch ins Bett und sagts engern Mon ös seits kräng, und lamatierts und übelts nur recht, und das treibts fort bis aufm Sunta, wann i die Predi halt, und da wir (werde) i predigen, daß wer z'Haus a krangs Kind, an krängen Mon, a krangs Weib, an krangen Vater, a kränge Muader, a kränge Schwester, Bruader, oda wers sunst nacha is, hat, und der thut a Wollfart aufm Göckerliberg in Wälischland, wo ma um an Kreuzer an Metzen Lorberbladen kriegt, dem wirds kränge Kind, der kränge Mon, 's kränge Weib, der kränge Vater, d'kränge Muader, d'kränge Schwester, oda  
 10 wers sunst nacha is, auf der Stell gsund.«

»Dös wir i schon machen,« hat die Bäurin drauf gsagt. No, drauf, aufm Mittwoch hat sie halt d'Bäurin ins Bett glegt und hat glamatiert und gübelt als wie, und ihr Mon hat ihr alles brucht, was er nur gwißt hat, 's hat aber halt nix gholfn. Wie denn der Sunta kuma is, hat d'Bäurin gsagt: »Mir is zwar so miserabel als ob i glei verschaden sollt, aber ans möcht i do no vor mei End, i möcht halt in Herrn Pfarra sei Predi hörn, dö er heund halten wird.« »A, mei Kind,«  
 15 sagt der Baur drauf, »thu du dös nit, du kunntst schlechter wern, wann aufstundst. Schau, es wir i in d'Predi gehn und wir recht acht gebe und wir dir alles wieder derzöhl, was der Herr Pfarra gsagt hat.« »No,« hat d'Bäurin gsagt, »so geh halt und gib recht acht und derzöhl mir alles, was d'ghört hast.« No, und da is der Baur halt in d'Predi ganga, und da hat der Herr Pfarra also anfangt zun predigen und hat halt gsagt, wann ans a krangs Kind, an krangen Mon, a krangs Weib, an krangen Vater, a kränge Muader, a kränge Schwester, Bruader, oda wers sunst nacha war, z'Haus  
 20 hat, und der wollt a Wollfart machen aufm Göckerliberg in Wälischland, wo der Metzen Lorberbladen an Kreuzer kost, dem wirds kränge Kind, der kränge Mon, 's kränge Weib, der kränge Vater, d'kränge Muader, d'kränge Schwester, Bruader, oda wers sunst nacha war, auf der Stell gsund wern, und wer also dö Ras unternehma wollt, der soll nach der Meß zu ihm kuma, da wird er ihm den Lorbersack gebn und den Kreuzer. Da war niembd fröher als der Bauer, und nach der Meß is er gleich zum Pfarra ganga, und der hat ihm also den Lorbersack gebn und den Kreuzer.  
 25 Drauf is er nach Haus kuma und hat schon bei der Haustür eini geschrien: »Juchesha, liebes Weib, hietzt is so viel als obs gsund warst. Der Herr Pfarra hat heunt predigt, daß wer a krangs Kind, a krangen Mon, a kranges Weib, an krangen Vater, a kränge Muader, a kränge Schwester, Bruader, oda wers sunst nacha war, z'Haus hat, und der macht a Wollfart aufm Göckerliberg in Wälischland, wo der Metzen Lorberbladen an Kreuzer kost, dem wirds 's kränge Kind, der kränge Mon, 's kränge Weib, der kränge Vater, d'kränge Muader, d'kränge Schwester, Bruader, oda wers sunst  
 30 nacha war, auf der Stell gsund; und hietzt hab i mir schon den Lorbersack gholt vom Herrn Pfarra und den Kreuzer, und wir glei mein Wanderschaft antreten, daß d' desto ehender gsund wirst;« und drauf is er fort ganga. Er war aber kam fort, so is die Bäurin schon auf gwesn, und der Pfarra war a glei do. Hietzt lassen wir aber dö zwa indessen auf der Seiten und gänga mir mit'n Baur. Der is halt alleweil drauf los ganga, damit er desto ehender aufm Göckerliberg kummt, und wie halt so geht, begegnt ihm sein Gvatter. Sein Gvatter dös war an Armon (Eiermann), und der is just  
 35 von Mark kuma, wo er seine Ar verkauft hat. »Gelobt seist,« sagt sein Gvatter, »wo gehst denn so trabi hin, Gvatter?« »In Ewigkeit, Gvatter,« sagt der Baur, »mein Weib is krang worn, und da hob i heund in Herrn Pfarra sein Predi ghört, und da hat er predigt, daß wann aner z'Haus an krangs Kind, an krangen Mon, a krangs Weib, an krangen Vater, a kränge Muader, a kränge Schwester, Bruader, oda wers sunst nacha war, hat, und er macht a Wollfart aufm Göckerliberg in Wälischland, wo der Metzen Lorberbladen an Kreuzer kost, dem wird's kränge Kind, der kränge Mon,  
 40 's kränge Weib, der kränge Vater, d'kränge Muader, d'kränge Schwester, Bruader, oda wers sunst nacha war, auf der Stell gsund, und da hab i mir von Herrn Pfarra den Lorbersack und den Kreuzer gholt, und hietzt trit i halt mein Wanderschaft an.« »Aber hanz, Gvatter,« hat der Gvatter zum Baur gsagt: »Seids denn gar so bucket (einfältig), daß so was glauben könts? Wißts, was is? der Pfarra möcht gern mit engern Weib an ganzen Tag allan recht vergnügt zubringa, drum habn's eng den Bärn anbunden, daß ihr'en aus'n Füßen kumts.« »Mein,« hat der Baur gsagt, »so möcht  
 45 i do wissen, ob das wahr is.« »No,« hat der Gvatter gsagt, »wast was, setz di in mein Arkorb eini, so will i di nach Haus tragn, und da wirst es selber segn.« No, das is also geschehn, und den Baur hat sein Gvatter in sein Arkorb eini gsetzt, und der hat'n nach Haus tragn. Wie's nach Haus kuma san, holla, da is schon lusti zuganga. Da hat die Bäurin schon fast alles, was nur in ihrem Hof war, abgestochen ghabt, und Krapfen hats bachten, und der Pfarra war a schon da und hat a sein Geige mitbracht ghabt. Und da hat halt der Gvatter anklopft, und d'Bäurin hat gfragt, wer draussen war.  
 50 »I bins, Gvatterin,« hat der Gvatter gsagt, »mei, gebts mir heund nacht a Herberg, i hab meine Ar aufm Mark nit verkauft, und hietzt muß i's wieder nach Haus trage, und sö san gar z'schwar, i bring's nit fort, es is a schon finster.« »Ja, mein Gvatter,« sagt d' Bäurin drauf, »ös kumts mir recht zur unlegna Zeit. No, weils halt her nit anders is, so kömts eina und setz's eng dort auf d'Ofenbank.« No hat sie der Gvatter also mit sein Buckelkorb auf d'Ofenbank gsetzt. Der Pfarra aber und d'Bäurin dö warn halt recht lusti. Endli fangt der Pfarra an und sagt: »Hanz, mein liebi  
 55 Bäurin, ös könnts ja so schön singa, singts mir do ans.« »A,« sagt die Bäurin, »hietzt kann i nix mehr singa, ja, in

mein junge Jahren, da hab i's wohl können, aber hietzt is schon vorbei.« »Ei,« sagt wieder der Pfarrer, »sings do nur a bißl.« No, da fangt die Bäuerin an und singt:

60 »I hab mein Mon wohl ausgesandt  
aufm Göckerliberg in Wälischland.«

Drauf singt der Pfarrer:

65 »I wollt, er blieb da a ganzes Jahr,  
was fragt i nach dem Lorbersack.  
Halleluja!«

Hietzt fangt der Gvatter hinten an und singt (da muß i aber derzöhl'n, daß der Baur Hildebrand ghassen hat) also der Gvatter:

70 »Ei du, mein lieber Hildebrand,  
was machst du auf der Ofenbank?  
Halleluja!«

75 Und hietzt singt der Baur in Korb drinna a: »Hietzt kann i das Singa nimmermehr leiden, hietzt muß i aus  
mein Buckelkorb steigen.«

Und steigt aus'n Korb und prügelt den Pfaffen beim Haus hinaus.  
(1260 words)

Quelle: <https://www.projekt-gutenberg.org/grimm/khmaerch/chap097.html>